



"SYAABAN; MENUKAR BUKU, MEMUHASABAH AMALAN"

الْحَمْدُ لِلَّهِ الْقَائِلٌ: يَمْحُوا اللَّهُ مَا يَشَاءُ وَيُثْبِتُ وَعِنْدَهُ رَصْدٌ

أَمْ الْكِتَابِ ٣٩

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ
وَأَشْهَدُ أَنَّ مُحَمَّداً عَبْدُهُ وَرَسُولُهُ. اللَّهُمَّ صَلِّ
وَسِّلِّمْ عَلَى سَيِّدِنَا مُحَمَّدٍ وَعَلَى آلِهِ وَاصْحَابِهِ
أَجْمَعِينَ. أَمَّا بَعْدُ، فِيَّا أَيُّهَا الْمُسْلِمُونَ! اتَّقُوا اللَّهَ،
أُوْصِيْكُمْ وَإِيَّا يَ بَتَّقُوا اللَّهَ فَقَدْ فَازَ الْمُتَّقُونَ. قَالَ
الَّهُ تَعَالَى: يَأَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ
وَلَا تَمُوتُنَ إِلَّا وَأَنْتُمْ مُسْلِمُونَ.

Sidang Jumaat yang Dirahmati Allah.

Terlebih dahulu saya menyeru para jemaah sekalian, marilah kita tingkatkan ketakwaan kita ke hadrat Allah SWT, dengan mengerjakan segala yang diperintah-Nya dan menjauhi segala larangan-Nya. Mudah-mudahan



kita termasuk dalam golongan orang-orang yang mendapat perlindungan Allah dan keampunan serta rahmat-Nya didunia dan diakhirat kelak.

Tajuk khutbah kita pada hari ini ialah "**SYAABAN; MENUKAR BUKU, MEMUHASABAH AMALAN**".

Muslimin yang dirahmati Allah,

Sesungguhnya, kedatangan bulan Syaaban wajar dialu-alukan oleh umat Islam, kerana bulan Syaaban adalah bulan yang mulia, bulan beribadah dan bulan memperbaiki diri. Bulan Syaaban terletak antara bulan Rejab dan bulan Ramadhan. Jika bulan Rejab ada Israk dan Mikrajnya, Ramadhan pula ada malam Lailatul Qadarnya, maka bulan Syaaban pula ada Nisfu Syaabannya.

15 hari bulan Syaaban yang sering disebut sebagai Nisfu Syaaban adalah termasuk hari istimewa dalam Islam kerana hari itu mengandungi beberapa kelebihan, dan Allah menurunkan rahmat-Nya serta memberikan keampunan kepada hamba-Nya.

Hadis daripada Ali Bin Abi Talib RA bahawa Rasulullah SAW bersabda:

إِذَا كَانَتْ لَيْلَةُ النِّصْفِ مِنْ شَعْبَانَ فَقُومُوا
لَيْلَهَا وَصُومُوا نَهَارَهَا فَإِنَّ اللَّهَ يَنْزُلُ فِيهَا
لِغُرُوبِ الشَّمْسِ إِلَى سَمَاءِ الدُّنْيَا فَيَقُولُ أَلَا مِنْ
مُسْتَغْفِرٍ لِي فَأَغْفِرَ لَهُ أَلَا مُسْتَرْزِقٌ فَأَرْزُقُهُ أَلَا



مُبْتَلٰي فَأَعَافِيهُ أَلَا كَذَا حَتَّى يَطْلُعَ
الْفَجْرُ

"Apabila tiba malam Nisfu Syaaban maka kamu hidupkanlah malamnya dan kamu berpuasa di siang harinya, sesungguhnya Allah turun (hampir) padanya dari terbenam matahari ke langit dunia dan berfirman: Sekiranya terdapat orang yang memohon keampunan maka Aku ampunkannya, sekiranya terdapat orang yang meminta rezeki maka Aku beri rezeki kepadanya, sekiranya terdapat orang yang ditimpa bala maka Aku sejahterakannya, sekiranya begitu... sekiranya begini... sehingga terbitnya fajar".

(Riwayat Ibnu Majah).

Malam Nisfu Syaaban, segala catatan amalan manusia dilaporkan ke hadrat Allah SWT. Apabila sampai waktu perhitungan amalan kelak, catatan-catatan itu akan dijadikan sebagai saksi terhadap perbuatan yang dilakukan manusia. Perhitungan amalan ini akan dilakukan dengan pelbagai cara iaitu melalui soal jawab, membacakan kandungan buku catatan amal, memperdengarkan rakaman percakapan, menayangkan gerak geri dan tingkah laku serta melaksanakan timbangan amal.

Firman Allah SWT dalam surah Yasin ayat 65:

الْيَوْمَ نَخْتِمُ عَلَىٰ أَفْوَاهِهِمْ وَتُكَلِّمُنَا أَيْدِيهِمْ وَتَشَهِّدُ
أَرْجُلُهُم بِمَا كَانُوا يَكْسِبُونَ



"Pada waktu itu Kami paterikan (tutup) mulut mereka (sejurus); dan (memberi peluang kepada) tangan-tangan mereka memberitahu Kami (kesalahan masing-masing), dan kaki mereka pula menjadi saksi tentang apa Yang mereka telah usahakan".

Muslimin yang berbahagia,

Para ulama' dan orang-orang soleh biasanya membaca surah Yassin tiga kali sesudah solat Maghrib malam Nisfu Syaaban, dan berdoa, baik secara sendirian atau berjemaah dengan harapan agar dikurniakan Allah ketetapan iman dan Islam, lapang rezeki dan panjang umur serta mati dalam khusnul khatimah.

Walaupun diketahui tiada sumber khas yang menyarankan berbuat demikian, namun dipandang dari segi ibadah dan mendekatkan diri kepada Allah SWT, aktiviti seperti itu amatlah baik. Kita sedia maklum, membaca al-Quran amat besar ganjaran pahalanya. Setiap satu huruf diberi 10 kebajikan. Bayangkan jika 86 ayat dalam surah Yassin dibaca mengandungi berapa ribu huruf sudah pasti mendapat ganjaran besar dari Allah SWT. Selepas itu diikuti dengan doa.

Berdoa memang disyariatkan Islam sebagaimana firman Allah SWT dalam surah al-Mukmin ayat 60:

وَقَالَ رَبُّكُمْ أَدْعُونِي أَسْتَجِبْ لَكُمْ ...

"Dan Tuhanmu berfirman, berdoalah kepada-Ku, pasti aku mengabulkan bagimu".

Hadis daripada Anas B. Malik RA bahawa Rasulullah SAW bersabda:



الدُّعَاءُ مُخْبِرُ الْعِبَادَةِ

"Doa adalah otak kepada ibadat".

(Riwayat at-Tirmizi).

Sidang Jumaat yang dirahmati Allah,

Sesungguhnya setiap orang Islam wajib beriman bahawa Allah SWT telah melantik para Malaikat (Raqib dan Atid) untuk mencatat segala tingkah laku manusia semasa berada di atas dunia sama ada yang baik dan yang buruk, sama ada dalam keadaan sedar atau lupa, dalam keadaan bergurau atau bersungguh-sungguh, yang zahir atau yang batin, sehingga nafas dan rintihan pun dicatat sama.

Firman Allah SWT dalam surah al-Kahfi ayat 49:

وَوُضِعَ الْكِتَبُ فَتَرَى الْمُجْرِمِينَ مُشْفِقِينَ مِمَّا فِيهِ
وَيَقُولُونَ يَوْمَ لَنَا مَا لِنَا هَذَا الْكِتَبُ لَا يُغَادِرُ صَغِيرَةً
وَلَا كَبِيرَةً إِلَّا أَحْصَنَهَا وَوَجَدُوا مَا عَمِلُوا حَاضِرًا وَلَا

يَظْلِمُ رَبُّكَ أَحَدًا

"Dan "Kitab-kitab Amal" juga tetap akan dibentangkan, maka Engkau akan melihat orang-orang yang berdosa itu, merasa takut akan apa yang tersurat di dalamnya; dan mereka akan berkata:" Aduhai celakanya kami,



mengapa Kitab ini demikian keadaannya? ia tidak meninggalkan yang kecil atau yang besar, melainkan semua dihitungnya!" dan mereka dapati segala yang mereka kerjakan itu sedia (tertulis di dalamnya); dan (ingatlah) Tuhanmu tidak berlaku zalim kepada seseorangpun".

Muslimin yang dirahmati Allah,

Rasulullah SAW melakukan pelbagai amalan dalam bulan Syaaban. Menurut hadis daripada Saiditina Aishah RA, bulan yang paling banyak Nabi SAW berpuasa selain bulan Ramadhan ialah bulan Syaaban.

لَمْ يَكُنِ النَّبِيُّ صَلَّى اللَّهُ عَلَيْهِ وَسَلَّمَ يَصُومُ فِي شَهْرٍ أَكْثَرَ مِنْ
شَعْبَانَ فَإِنَّهُ كَانَ يَصُومُ شَعْبَانَ كُلَّهُ

"Tidaklah Nabi SAW melakukan ibadat Puasa dalam suatu bulan yang lebih banyak daripada bulan Syaaban. Sesungguhnya Rasulullah SAW berpuasa dalam bulan Syaaban keseluruhannya".

(Riwayat al-Bukhari).

Persoalannya, mengapa Rasulullah SAW banyak berpuasa pada bulan Syaaban?

Jawabnya berdasarkan sabda Rasulullah SAW yang bermaksud,

"Inilah bulan Syaaban di mana manusia lalai mengenainya, ia adalah bulan di mana segala amalan diangkat kepada Allah SWT. Maka aku sangat suka sekiranya amalan ku diangkat sedangkan pada masa itu aku dalam keadaan berpuasa".

(Riwayat Ahmad).



Walaupun begitu, ulama Feqah menyatakan, ada sedikit peraturan bagi mereka yang hendak berpuasa sunat Syaaban. Adalah dilarang (tidak disunatkan) berpuasa Syaaban tanpa sebab pada separuh kedua daripada bulan Syaaban kecuali jika dihubungkan dengan hari yang sebelumnya, walaupun dengan hari yang ke-15 Syaaban.

Dalam satu riwayat lagi, Saidatina Aishah RA juga pernah menerangkan, bahawa pada malam Nisfu Syaaban, Rasulullah SAW mendirikan solat-solat sunat hingga pagi. Baginda bersabda kepada ku, "*Malam ini adalah malam Nisfu Syaaban, di mana amal ibadat kita diangkat dan dipersembahkan kepada Allah SWT*".

Adalah menjadi amalan para sahabat Rasulullah SAW, apabila melihat anak bulan Syaaban mereka bersungguh-sungguh membaca al-Quran.

Oleh itu, setiap orang yang berada dalam bulan Syaaban hendaklah mengisinya dengan pelbagai ibadat. Allah telah menjanjikan kemuliaan, kedudukan yang tinggi dan kebajikan yang sangat banyak serta dikurniakan maghfirah kepada mereka yang melakukan ibadah dalam bulan ini.

Sidang Jumaat yang dirahmati Allah sekalian,

Firman Allah SWT dalam surah az-Zalzalah ayat 6-8:

يَوْمَئِنِ يَصُدُّرُ الْنَّاسُ أَشْتَاتًا لَّيْرَوْا أَعْمَلَهُمْ
فَمَنْ يَعْمَلْ مِثْقَالَ ذَرَّةٍ خَيْرًا يَرَهُ وَمَنْ يَعْمَلْ
مِثْقَالَ ذَرَّةٍ شَرًّا يَرَهُ



"Pada hari itu manusia akan keluar berselerak (dari kubur masing-masing) - untuk diperlihatkan kepada mereka (balasan) amal-amal mereka. Maka sesiapa berbuat kebajikan seberat zarah, nescaya akan dilihatnya (dalam surat amalnya)! Dan sesiapa berbuat kejahatan seberat zarah, nescaya akan dilihatnya (dalam surat amalnya)!".

Apabila Rasulullah SAW membacakan ayat tersebut kepada para sahabatnya, maka ramai dalam kalangan para sahabat Rasulullah SAW menangis teresak-esak menyesal akan perbuatannya kerana telah melakukan kesalahan dan amalan yang bertentangan ajaran Islam. Di antara para sahabat itu termasuklah Saidina Umar al-Khattab RA. Beliau merasa sangat malu apabila perbuatannya yang hina itu dipertontonkan oleh Allah kepada seluruh makhluk di akhirat nanti. Justeru, Rasulullah SAW menerangkan kepada mereka, bahawa kejahatan yang dilakukan seseorang sebelum masuk Islam, maka apabila sudah masuk Islam, semua dosa-dosanya akan ditutup oleh Allah SWT.

Sidang Jumaat yang dirahmati Allah,

Dewasa ini kebanyakan kita menyambut bulan Syaaban hanya tertumpu pada kenduri arwah, menziarahi kubur dan membaca surah Yassin serta doa pada malam Nisfu Syaaban. Walaupun amalan yang kita lakukan itu adalah ciri-ciri ibadah, namun amalan kita itu masih kurang ke arah mendekatkan diri kepada Allah SWT.

Oleh yang demikian, marilah kita menambah amalan kita itu dengan berpuasa sunat Syaaban, mendirikan solat-solat sunat, beristighfar, berselawat, bertasbih, membaca al-Quran, berdoa, bersedekah dan berziarah ke tempat-tempat mulia sepanjang bulan yang mulia ini.



Muslimin yang dirahmati Allah,

Sempena bulan Syaaban tahun ini, marilah kita melakukan amalan seperti berikut:

1. Kita hendaklah meningkatkan ibadat kepada Allah dan meninggalkan segala larangan-Nya.
2. Umat Islam hendaklah mencontohi amalan Rasulullah dalam bulan Syaaban seperti berpuasa dan qiamullail khususnya malam Nisfu Syaaban.
3. Umat Islam mestilah penuh yakin bahawa setiap amalan yang kita lakukan di atas dunia ini akan dipamerkan di akhirat kelak dan akan dibalas dengan adil oleh Allah SWT.

أَعُوذُ بِاللَّهِ مِنَ الشَّيْطَنِ الرَّجِيمِ
فَمَن يَعْمَلْ مِنْ الصَّالِحَاتِ وَهُوَ مُؤْمِنٌ فَلَا
كُفَرَانَ لِسَعْيِهِ وَإِنَّا لَهُ كَاتِبُونَ



"Dengan yang demikian, sesiapa yang mengerjakan sesuatu amal kebaikan, sedang ia beriman, maka tidaklah disia-siakan amal usahanya; dan sesungguhnya Kami tetap menulisnya".

(Surah al-Anbia' : 94).



بَارَكَ اللَّهُ لِي وَلَكُمْ بِالْقُرْآنِ الْعَظِيمِ،
وَنَفَعَنِيْ وَإِيَّا كُمْ بِمَا فِيهِ مِنَ الآيَاتِ وَالذِّكْرِ
الْحَكِيمِ وَتَقْبَلَ مِنِّي وَمِنْكُمْ تِلَاقَتُهُ، إِنَّهُ هُوَ
السَّمِيعُ الْعَلِيمُ.

أَقُولُ قَوْلِيْ هَذَا وَأَسْتَغْفِرُ اللَّهَ الْعَظِيمَ لِيْ
وَلَكُمْ وَلِسَائِرِ الْمُسْلِمِينَ وَالْمُسْلِمَاتِ،
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



KHUTBAH KEDUA

الْحَمْدُ لِلّٰهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ
الطَّيِّبَاتِ. أَشْهَدُ أَنَّ لَا إِلَهَ إِلَّا اللّٰهُ وَحْدَهُ، لَا
شَرِيكَ لَهُ، وَأَشْهَدُ أَنَّ مُحَمَّداً عَبْدُهُ، وَرَسُولُهُ.
اللّٰهُمَّ صَلِّ وَسِلِّمْ وَبَارِكْ عَلٰى سَيِّدِنَا مُحَمَّدٍ
وَعَلٰى آلِهِ وَصَحْبِهِ وَمَنْ تَبَعَهُمْ بِإِحْسَانٍ إِلَى
يَوْمِ الدِّينِ. أَمَّا بَعْدُ، فَيَا عِبَادَ اللّٰهِ، اتَّقُوا اللّٰهَ فَقَدْ
فَازَ الْمُتَّقُونَ.

Sidang Jumaat yang dirahmati Allah SWT,

Mimbar Jumaat sekali lagi berpesan bahawa Islam mengajar umatnya supaya bersikap sederhana dalam segala amalan dan tindakan. Pada masa yang sama umat Islam disaran supaya menjauhi sebarang bentuk perbuatan ekstremis yang kesannya akan menjadikan keharmonian, perpaduan, keselamatan ummah dan Negara. Tindakan ekstremis juga boleh memberikan tanggapan negatif terhadap kesucian dan kemuliaan agama islam. Sebaliknya seluruh umat islam amatlah dituntut agar menampilkkan kemuliaan akhlak, sikap dan keperibadian tinggi sebagai muslim sejati agar



umum mengetahui bahawa Rasulullah SAW diutus dan Islam yang diperjuangkan adalah rahmat bagi seluruh umat dan sekalian alam.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَأْمُرُهَا
الَّذِينَ آمَنُوا صَلَوَةً عَلَيْهِ وَسَلَّمُوا تَسْلِيمًا. اللَّهُمَّ
صَلِّ وَسَلِّمْ عَلَى سَيِّدِ الْمُرْسَلِينَ وَارْضِ اللَّهُمَّ عَنْ
أَصْحَابِهِ وَقَرَابَتِهِ وَأَزْوَاجِهِ وَذُرِّيَّاتِهِ أَجْمَعِينَ.
الَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ الْأَحْيَاءَ مِنْهُمْ وَالْأَمْوَاتِ، إِنَّكَ
سَمِيعٌ قَرِيبٌ مُجِيبٌ الدُّعَواتِ وَيَا قَاضِيَ
الْحَاجَاتِ. اللَّهُمَّ إِنَّا نَسْأَلُكَ وَنَتَوَسَّلُ إِلَيْكَ بِنَبِيِّكَ
الْأَمِينِ، وَنَسْأَلُكَ بِأَسْمَائِكَ الْحُسْنَى وَصِفَاتِكَ
الْعَظِيمَى آنْ تَحْفَظَ بَعِينَ عِنَائِتِكَ الرَّبَّانِيَّةَ وَبِحِفْظِ
وِقَائِتِكَ الصَّمَدَانِيَّةِ، حَلَّةَ مَلِكِنَا الْمُعَظَّمِ سُلْطَانِ



سَلَّٰعُورُ، سُلْطَانُ شَرَفُ الدِّينِ ادْرِيسُ شَاهُ
الْحَاجُ ابْنُ الْمَرْحُومِ سُلْطَانُ صَلَّٰحُ الدِّينِ عَبْدُ
الْعَزِيزُ شَاهُ الْحَاجُ. اللَّهُمَّ أَدِمِ الْعَوْنَ وَالْهَدَايَةَ
وَالْتَّوْفِيقَ، وَالصِّحَّةَ وَالسَّلَامَةَ مِنْكَ، لِوَلِيٍّ عَهْدِ
سَلَّٰعُورُ، تَغْكُو أَمِيرَ شَاهِ ابْنِ السُّلْطَانِ شَرَفُ
الْدِينِ ادْرِيسُ شَاهُ الْحَاجُ فِي أَمْنٍ وَصَلَّاحٍ وَعَافِيَةٍ
بِمَنْكَ وَكَرَمِكَ يَا ذَالْجَلَالَ وَالْإِكْرَامِ. اللَّهُمَّ أَطْلِ
عُمَرَهُمَا مُصْلِحَيْنَ لِلْمُوَظَّفِينَ وَالرَّعِيَّةَ وَالْبِلَادِ،
وَبَلِّغْ مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadrat-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkuuhkan negara umat Islam khususnya negeri Selangor, sebagai negeri yang maju, sejahtera dan berkebajikan.

Justeru kami pohon kehadrat-Mu ya Allah, tetapkanlah iman kami, terimalah amalan kami, kukuhkanlah perpaduan kami, luaskanlah rezeki



kami, kayakanlah kami dengan ilmu yang bermanfaat, suburkanlah jiwa kami dengan budi pekerti yang mulia, kembalikanlah kami ke jalan yang Engkau redhai, lindungilah kami daripada bala bencana dan ujian-Mu yang berat supaya dengan demikian, negeri kami akan sentiasa bertambah makmur dan berkat.

Ya Allah, kami pohon kehadratmu, mantapkanlah pegangan kami menurut ajaran Ahli Sunnah Wal Jamaah dan peliharalah kami daripada amalan dan akidah yang menyeleweng dan sesat seperti fahaman Syiah, Qadyani serta lain-lain fahaman.

Ya Allah, bukakanlah hati kami untuk mendirikan solat fardhu lima waktu, menunaikan zakat dan kefarduan yang lain. Berkatilah hidup orang-orang yang melaksanakan zakat dan menyayangi fakir miskin serta mereka yang menginfakkan harta untuk Tabung Amanah Pembangunan Islam Selangor (TAPIS) dengan ganjaran pahala yang berkekalan hingga ke hari akhirat.

Demikian juga ya Allah, tambah dan luaskanlah rezeki orang yang mewakafkan hartanya, terimalah wakaf mereka dengan ganjaran pahala yang berkekalan hingga ke hari akhirat.

رَبُّنَا هَبْ لَنَا مِنْ أَرْوَاحِنَا وَذُرِّيَّتِنَا قُرَّةً أَعْيُنٍ
وَأَجْعَلْنَا لِلْمُتَّقِينَ إِمَامًا. رَبُّنَا عَاتَنَا فِي الدُّنْيَا
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. عِبَادَ
اللَّهِ، إِنَّ اللَّهَ يَأْمُرُ بِالْعَدْلِ وَإِلَّا حُسْنٌ وَإِيتَاءٌ ذِي



الْقُرَبَىٰ وَيَنْهَا عَنِ الْفَحْشَاءِ وَالْمُنْكَرِ وَالْبَغْيِ
يَعْظُّكُمْ لَعَلَّكُمْ تَذَكَّرُونَ ﴿٩﴾

فَادْكُرُوا اللَّهَ الْعَظِيمَ يَدْكُرُكُمْ وَاسْكُرُوهُ عَلَىٰ
نَعْمَهِ يَزْدَكُمْ، وَاسْأَلُوهُ مِنْ فَضْلِهِ يُعْطِكُمْ
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.